

## Skiweekend vo de Dameriege in Brigels (8.-10.01.10)

Guet gluunt simmr am Frittigabig miteme 16er-Büsli uf Brigels gfare. Zersch ohni Problem, doch denn ischs Auto uf de schneebedeckte Strass immer wieder chli is Schlüüdere cho. ☺ Mit de Gebruchsawiisig und em Herr Straub sinere Hilf hets schlussendlii klappet d Schneechette z montiere und miir hend de Rest vode Fahrt chönne in Agriff nääh. Dobe hemmr denn dii riesig Militärunderkunft bezoge, während Steffi na gnaustens instruiert worde isch über Notuusgäng und Ruumbenützig. As Schlafe het ez na niemert denkt; soo simmr churz drufabe auu scho wieder all zeme am Werwölfele xii. Wommr ufde Uhr gseh hend, dasses scho zweii am Morge isch, hemmr eus doch entschiede, langsam is Bett z gah.

Am nächste Morge hend Steffi und Anja aagfange de Zmorge parat mache, während anderi lieber nachlii im warme Bett bliebe sind. Bis auu endlii di hinderst und letscht im Esssaal iitroffe isch, hend di einte scho es Fotoshooting hinder sich gha. Am elfii simmr ufde Pischte xii. Doch de Petrus hets nid guet gmeint mit eus. Eusi Reiseleiterin het nid mal meeh d Markierige gseh und isch gad in Bach inegfahre. Nach paar Abfahrte simmr duuregfreore sho es erschts Mal id Beiz iikehrt. Die einte sind bis zum Zmittag ide Wärmi bliebe, anderii sind doch namal id Chältii use. Bim Zahle sind denn na Nussgipfel vergesse gange, so dassmr eus döt s ganze Wuchenend nie meh blicke laa hend.

Auu am Namittag ischs Wetter nid besser worde und mir sind bald emal ide Schirmliibar glandet, womr s eint oder ander no vom letschte Skiweekend bekannte Gsicht aatroffe hend. Füü Underhaltig isch wie scho im vergangene Jahr miteme Tanz ufem Dach gsorget xii. Wommr denn na elei ide Bar xii sind, hemmr eusi Chleidr für in Uusgang usem tüüfkühelte Büslii gholt und eus zwüschet Tisch und Stühel umzoge. Nacheme Spaziergang querfeldii simmr schliesslich direkt bide Pizzeria glandet. Chum aacho hend scho wieder all Gäst ihri Auge uuf eus grichtet gha. Debii hemmr doch nume welle die Trennwand zwüschet de beide reservierte Tisch use nääh, damit mir all binendand chönnd hockke. Keini zwei Minute nachdem endli Vorspiise serviert worde isch, trotted Sternsinger iis Restaurant und singed eus Gäst rätromanischi Lieder vor. Pizza het eus allne wunderbar gshmöckt und mir sind scho bald es Huus wiiter. Leider het de DJ im ‚La Val‘ chlii dii falsch Muusig uufgleit und so simmr füü eimal scho chli frühener vom Uusgang zrug cho.

Am nächscte Morge wieder di glich Prozeduur wie scho am Samstig. Nachem Huusputz simmr mitsamt em Gepäck zude Talstation gfare und hend bald dii erschte Schwümg oberhalb vom Nebelmeer gmacht. Blaue Himmel und perfektii Pischte, wa wetsch na meeh?! Leider hets denn en chliine Zwüüschefall gää, wo de Schlitte het müsse cho und miit eusere Verletzte ab in Spital fräse. Eusii Vermuetige uf ee Hirnerschütterig sind bestätigt worde und uf de Schock abe simmr id Beiz. Bis Skilift zuegmacht hend, hemmr na paar tollii Abfahrte chönne mache. Nachane isches heizue gange und mir hends sogar ohni em Jonny Bluff sinere Hilf gschafft, d Chette abzmodiere. Ooh Wunder! ☺ Und scho bald simmr im schöne Wiesedange iitroffe, hend eusii Boards und Köffere gschnappet und eus mit vielne tolle Erinnerige aa das Weekend uf de Heiweg gmacht.

Jessica Minder